

01. juni

Nunatsinni sulisinnaasut tamarmik atorfeqalernissaat anguniarlugu, minnerunngitsumillu kalaallinik atorfilinnik qaffakkiartortitsinissamik anguniaqartumik, atorfilinnik pikkorissaa-sarnerup kalaallinut iluaqutaanerusumik aqqissuunneqarnissaanik oqallinnissamik siunner-suut.

(Inatsisartunut ilaasortaq Hans Enoksen, Partii Naleraq)

Siumumiit nuannaarutigaarput Hans Enoksen, Partii Naleraq, oqaluuserisassamut pingaaruteqartumut oqaluuserisassanngortitsineranut.

Nuna namminersulivinnissamik siunertaqartup inuisa pingaartitassaraat sapinngisamik pisinnaasat piginnaasallu nunamut naleqquttut pilersissallugit namminerlu ingerlatsilissallugit.

Nunatsinni anguniagassaajuartariaqarpoq sulisinnaasut tamarluinnarmik atorfeqalernissaminnut periarfissaqartinneqassallutit, taamaasilluni ilisimasat piginnaasallu tamarmik nunatsinnut iluaqutissanngorlutik atortinneqarsinnaalissammata.

Ilisimasaneqarpoq suliffissaaleqinermut patsisit pingaernerit ilagigaat ilinniarsimasuunginneq, taamaattumik ilinniarnissamut kajumissaarunerup saniatigut suleqataasinnaasut tamarluinnarmik kivitseqataanissaat pisussaaffittut isigalugu tunniussaqaarnissaanik oqariartortuarneq atuuttariaqarmat.

Nunatsinni sulisinnaasut nunaqavissut atorfeqartitaanikkut pingaartinneqarlutik politikkeqarfigineqarpata atorfiit qaffasissut ilanngullugit nunatsinni amerlanerusunit tiguneqarsinnaapput. Tamannali pissappat politikikkut pingaartitsineq ilanngullugu avammut nalunaarutigineqaannarani aqqutissiorneqartariaqarpoq.

Qassiinni tusartarparput atorfiit qaffasissut avataanniit nunatsinni pissutsinik ilisimasaqarpallaangitsunik inuttalerneqarlutik ukui alunnguit ingerlanerini pikkorissariarlutik ilinniaqgeriarlutik soraartartut ilisimasallu pissarsiarineqartut atorlugit nunaminnut utertarput atorfimmik perusutaminnut atorfinissinnaalertarlutik, taamaasilluni nunatsinniit aningaasarpasuit ilisimasallu annaaneqartarlutik.

Periarfissaasoq avataanniit tikittartut ukiut aalajangersimasut atorfeqareernerminni kingorna pikkorissarnissanut ilinniaqqinnissamullu periarfissat ammaaneqartarnissaat.

Ingerlariaqqittoqassappat ingerlatsiniaanarluni (drift) ingerlatsineq qimannissaanut politikikkut piuumassuseqartoqartariaqarpoq aamma alloriarfissat tassaasariaqarput sumiiffinni ilisimaarinnilluni timitalersuisinnaaneq.

Nunatsinni tunngaviusunik ilinniagaqartut tassaasariaqarput qaffassarnissamik periarfissaqartitsinikkut atorfeqarfigisamiit politikikkullu taperserneqarlutik ingerlariaqqinnissamik aqqutissiuinneqartariaqartut taamatullu nunarput qimallugu ilinniariartortartut/nuuttartut periarfissaanik isigaluni kaammattuutitalerlugu ammaasinissaq. Isummerfigineqarsinnaasut ilagaat

ukiut qanoq amerlatigisut suliffimmi ataatsimi sulisimaguit ilisimasat piginnaasallu ima qaffasitsigilersimappata atorfinni qaffakkiartornissamut periarfissaqartitaasinnaanissaq aamma tamanna ”ilinniarsimanertut” nalilerlugu atortinneqarsinnaanissaat.

Nunaqavissut salliutillugit pineqartillugit immikkoortitsisoqarneranik oqallinnerit ingerlanneqalertarput, tamanna takussutissaavoq nunasiaataasimanermit nunasiaatillit nunaqavissullu akornanni pissaaneq sumi inissisimaneranik takutitsiviusartaq. Eqqaamaneqassaarmi sumi inunngorsimanermit akissaasersuinerup atuunnerat aatsaat 1990-kut aallartilaarnerani nungusinneqarmat, taamaattumik tupinnanngitsumik tamanna tikillattaallugu oqallinnerit ingerlanneqalersarput ilinniarfigalugit ingerlariaqqittoqartariaqarmat.

Ilinniaqqusigutta ilinniartitaaneq nunatsinni atuuttoq atorneqarpat naammassiffiuppallu ilinniarsimasut oqarfigisinnaangilugit ilinniagaat atorsinnaangitsoq. Soorunami ilinniagarisaat atorsinnaapput, arlaatigulli sanngiiffeqarpata nukittorsaaneq aqutugalugu ingerlaavartumik aqqiivigisariaqartoq pingaaruteqarpoq, tassaniipporlu politikikkut pikkorissuseq apeqqutaalluni ingerlariaqqinnissamut peqataatitsinikkut alloriarfissanik takunnissinnaaneq.

Taamaattumik politikikkut piunassuseqarfigalugu ajattuinnngitsumik alloriarfiginissaanut ingerlasariaqarpugut taamaasilluni nunatsinni innuttaasut ilisimassammassi ingerlariaqqiffisanik periarfissaqarunik tamanna aqutissaqartoq.

Taamak Siumumiit oqaaseqarluta oqallinnissamut periarfissinneqaratta qujavugut oqallinnissamullu peqataasaagut.

Suka K. Frederiksen

Siumut